


中州集




漢書門			
一	二	三	四
〇	七	八	九
冊	架	函	號

五

內閣文庫			
三	二	三	四
五	八	八	九
函	冊	號	類

內閣文庫			
番號	漢 11285		
冊數	10 (5)		
函號	358	77	





中州集姓氏摠

第五卷

見淺草文庫



史御史肅三十首

蕭尚書貢三十二首

史內翰公奕一首

龐都運鑄一十九首

許司諫古四首

王防禦良臣十首

中州集

卷五摠目

及十月

高治中庭玉四首

李治中適六首

陳司諫規二首

馮內翰延登一十七首

劉鄧州祖謙三首

高博州憲八首

王監使特起七首

李經六首

梁太常持勝一首

愚軒居士趙元三十五首

密國公璫四十首

中州集目錄
第五卷
史御史肅 三十首
偶讀賈逵之邀飯帖有感作詩哭之
河上
別張信夫
山陰縣
早出遵化
次韻安之飲酒
宿睦村

中州集目錄

第五卷

史御史肅 三十首

偶讀賈逵之邀飯帖有感作詩哭之

河上

別張信夫

別懷玉

山陰縣

方丈坐中

早出遵化

宿睦村

次韻安之飲酒

過九里山

道傍柳

登憫忠寺閣

讀傳燈錄

夏夜

物化

立秋日

感興

偶書

放言二首

曉出東廬

次張信夫韻

髮脫

立秋日

復齋

北潭

晚興

雜詩二首

春雪

蕭尚書貢

三十二首

渭南縣齋秋雨

假梅

臨泉道中

自感

荒田擬白樂天

樂府崔生

米元章大字卷

楊侯画晉公臨江賞

梅樂天與鳥窠禪師汎舟談玄不顧而

去戲為一絕以代晉公招樂天同飲云

漢歌

楚歌

悲長平

雒陽

中秋對月

寄答張維中

保德州天橋

靈石縣

真容院

讀火山瑩禪師卷

君馬白

陳宮詞

寄嵐

按部道中二首

日觀峰

族兄才鄉下第後赴

宜祿酒官以詩寄之

梨花

後趙

古採蓮曲

擬迴文四首

史內翰公爽一首

李雁門

龐都運鑄一十九首

雪谷曉寒圖

景骨城驛中夜雨

洛陽懷古

田器之燕子圖

晚秋登城樓二首 冬夜直宿省中

山行絕句

漉酒圖

夏日

花下

梨花

未開牡丹

却暑

懷友

喜夏

墨竹三首

山谷透綃帖

許司諫古

四首

青柯平二道人

被召過少室

扇圖

訪箕和尚峴山

王防禦良臣

一十首

送任李二生赴舉

汴堤懷古

旬休飲

息軒

九月七日飲

牧牛圖

狸奴画軸

雜詩三首

高治中庭玉 四首

天津橋同李之純待月一首

柳絮 道出平州寒食憶家

飛山怨

李治中適 六首

贈中山楊果正卿 江村

集句題廣寧勝覽亭

獅子峰 送窮

使高麗

陳司諫規 二首

送雷御史晞顏罷官南歸

過驪山

馮內翰延登 一十七首

郾城道中 元日隆安道中

宿三冢寺 代郡楊黻之與余同

辰月日時亦然渠有詩因為次韻

寄笏青柯平

射廂得山字

雪

華清故宮

西園得西字

八月十四日宿官塢

下院二首

探春得波字

春雨二首

燕花得春字

蘭子野晚節軒

洮石硯

劉鄧州祖謙 三首

雅集圖

崆峒山圖為橫溪翁

賦二首

高梅州憲 八首

元夕無燈

寄李天英

題新山寺壁

焚香六言四首

長城

王監使特起 七首

沁源山中

挽張代州詞

謾作

偶作

絕句二首

下第

李經

五首

雜詩五首

梁太常持勝

一首

海棠

愚軒居士趙元

三十四首

鄰婦哭

渡洛口

書懷繼元弟裕之韻四首

喜霽

詩送辛敬之東歸二

首

脩城去

田間秋日三首

客況

學稼

立秋日

村居夏日次韻答裕之

書懷

寄裕之二首

丙子夏卧病汗後有作

宿少林寺

次韻裕之見寄二首

題裕之家山圖
早發寶應龍門道中

有感
欽若遽有商於之行

作長語為別兼簡仲澤弟一笑

丁亥三月二十五日雪

大暑
讀樂天無可奈何歌

哀古道
薛鼎臣罷登封

密國公璫
四十一首

秋郊雨中
宴息二首

梁臺
自適

城西
送王生西游

王生以秋騷見示復以此謝之

自題寫真
黃華画古柏

書龍德宮八景亭
思婦

如庵樂事
題晉卿王暉寶繪

得友人書
內族子銳歸來堂

題潘閬夜歸圖

漫賦

寓跡

秋晚出郭閒遊

老境

北郊晚步

閒詠

池蓮

梁園

釋迦出山息軒画

過胥相墓

秋日小雨

東郊瘦馬

枕上聽雨

溪景

題紙衣道者圖

中州集 春半喜晴

漁父詞二首

史御馬伏波

留侯

對鏡二首京兆

夏晚登樓

華亭外史

華亭

權輿二首

無名氏

春半喜韻

前父信二首

中州集卷第五

戊集

史御史肅

三十首

肅字舜元京兆人僑居北京之和衆幼孤
 養於外家天資挺特高才博學作詩精緻
 有理尤善用事古賦亦奇峭工於字畫業
 科舉爲名進士立朝爲才大夫優於政事
 嚴而不苛所至有聲吏畏而安之累以廉
 陞歷赤縣及幕官入爲監察御史遷治書



出刺通州大中黨獄起爲所註誤謫靜難
軍節度副使大安初召爲中都路轉運副
使超戶部正郎復坐鑄降同知汾州事卒
官舜元素尚理性之學屏山學佛自舜元
歿之晚年頗喜養生謂人可以不死嘗欲
棄官學道而竟止於此可哀也已詩號溶
軒遺藁今在燕都鄭庭幹家其平生則見
之屏山故人外傳云

偶讀賈逵之邀飯帖有感作詩哭之

微官已歎鸞棲屈異事俄傳鵬告凶彩筆書來墨
痕濕玉樓人去酒尊空當時快意牛心炙今日傷
懷馬鬣封一幅銘旌送哀挽白楊蕭索九原風

河上

堤外三竿日河邊八尺泥夜風喧馬櫪秋露冷雞
棲歲月吾生老關山客夢迷故園桃李樹搖蕩不
成蹊

別張信夫

破壘殘星沒寒城曉角孤天低雲錯莫野曠雪糝
糊小市千錢米征人丈八安邊愁故未已不敢恨
長途

別懷玉

官曹不着市門仙綠髮忽忽換少年慣作簿書塵
裏夢愧無山水窟中緣蜂腰鶴膝曾搜句兔角龜
毛不論禪此別相思渺何許一川山色鴈連天

山陰縣

湧雲驅雨不成霖山徑危行未要深午夢初迴鳥
鳥樂小亭斜日柳陰陰

方丈坐中

紙本功名直幾錢何如付與北窗眠詩書作我閒
中地風月知人醉裏天水底游魚真見性樹頭語
鳥小叅禪平生習氣蓮華社一炷香前結後緣

早出遵化

朝來對酒不能觴看盡西風去鳥行山好未忘三
日雅詩窮贏得一秋忙強顏紅葉自由舞野性黃
花無賴香多謝殷勤算雲影更番淡墨寫溪光

宿睦村

闌干河漢已西傾獨坐披衣過五更簷馬丁東風
外響田車歷轆月中行忘形沙鳥知人意宰地山
雲不世情露草霜筠有幽意詩題分付候蟲聲

次韻安之飲酒

日上南窗已數竿醉頭扶起不巾冠欲開社氣多
招客先乞兵厨暫補官玩世唯知酒功聖藏身無
似醉鄉寬麒麟閣上功名字不博生前一笑歡

過九里山

斲蛇扛鼎兩爭雄陳迹荒涼萬事空今日山前無
過客數株衰柳管秋風

道傍柳

秋霜一何嚴凋此道傍柳殘枝幾葉在其勢不得

久憶昨三春時濯洗烟雨後弄姿舞粼粼
 勸我一盃酒別後遽能幾忽忽成老醜
 人生非金石長短百年壽功名與富貴
 於身亦何有古人隨物化今已柳生肘
 我獨何為哉窮年事奔走長堤隱落月
 駐馬一回首春風柳梢黃定得西歸否

登憫忠寺閣

淨宇懷超想層梯企俊游喧卑三界盡
 製作六丁愁聚土閒童子移山老比丘
 能除分外見寸木即

岑樓

讀傳燈錄

開戶懶不出真成任夏僧肝腸雖自苦
 面目得人憎處世若大夢學禪猶小乘
 早知文字悞更用讀傳燈

夏夜

一雨昭蘇外群山宴寂中移床就佳月
 引袂納涼風蝸舍怜渠小蚊雷訝許同
 幽懷闕清境舒嘯夜

將終
物化

物化能忘我天游不用心
羶香群蟻聚樹靜一蟬
吟敗井勞深汲荒庭闌近尋
枕書聊假息夕日半
墻陰

立秋日

舊穀催新穀
今秋似去秋
年衰猶健飯
官達也窮
愁樹鳥依依
宿簷螢細細
派箇中詩句
在倚杖得

冥搜

感興

避俗嫌高絕
干榮恥盜誇
居貧偶從仕
學道不忘
家樹果蕃秋
實園葵粲晚
花一軒吾事
了無意竟
紛華

偶書

東風數點梨花雪
吹我傷春萬里心
知有高亭堪
眺遠
惜無佳客共登臨
晴雲入戶團
傾蓋飛鳥隨

人作好音寒食清明少天色孤居未要酒杯深

放言二首

蓮社從來說陶遠竹林今不數山王家雞野鶩何
須較秋菊春蘭各自芳

又

清風明月無人管茶鼎薰爐與客同壯歲羞為襤
織子却今却羨嘒嘒翁

曉出東廬

谷口子真隱水濱韋氏莊鷗鷺賓客對鴻雁弟兄
行小圃藜生竹平林半是桑朝陽生野渡濕盡馬
蹄霜

次張信夫韻

絳帳先生寄一州不教文字到橫流草玄只擬開
門坐好事應從載酒游虎穴已曾探扁子龍溝未
信出龍頭錦囊詩句年來滿供盡閒花野草愁

髮脫

年年道路少清歡
處處葵蔬餽薄飡
月色過窗同夜夢
霜華著壁獨朝寒
求醫未有詩千首
破老惟消竹數竿
衰髮從今不須脫
少留衰白戴黃冠

立秋日

畏景流庭過涼颺
即坐來物隨時共
換人覺老相催
憩蝶依藂穩嘶蟬
抱樹哀玉簪香好
在墻角幾枝開

復齋

居士年來一復齋
馴庭鳥雀絕驚猜
雨添窗下硯池滿
風揭床頭書卷開
身似卧輪無伎倆
心如明鏡不塵埃
紛紛寵辱人間世
付與浮雲任去來

北潭

竹陰松影玉葱籠
十里平堤一徑通
碧水乍開新鏡面
青山都是好屏風
寒蟬高鳥清愁外
折葦枯荷小景中
酒力未多秋興逸
夕陽聊貸半林紅

晚興

秋蟲已息又還吟晚雨初晴又作陰水面微風掠
蒼玉雲頭落日綠黃金年豐酒價應須賤睡起茶
甌未要深入道雙清到心迹年來無迹亦無心

雜詩 二首

春江日暖舞清漣客舍蕭蕭一縷烟幽鳥隔林招
我醉小桃當戶為誰妍禪心已作沾泥絮詩思渾
如上水船却是官閒得無事一簾紅雨枕書眠

又

南皮城下荒秋草說是當日燕支臺世事翻騰只
如此吾生棄置已焉哉迎風紫萸回循老背日黃
花次第開獨夜不眠思阿謝白羊如駕小車來

春雪

豐年不救兩河飢臍盡纔看小雪飛謾說春來膏
澤好其如壟上麥苗稀空花只解驚愁眼溼絮寧
堪補敗衣頗笑西臺瘖御史日斜騎馬踏泥歸

蕭尚書貢

三十二首

貢字真卿咸陽人唐太傅寘十七代孫博
學能文不減前輩蔡正甫大定二十二年
進士自涇州觀察判官召補省掾不四五
月拜監察御史累遷右司郎中預脩泰和
律令所上條畫皆委曲當上心興陵嘉歎
曰漢有蕭相國我有蕭貢刑獄吾不憂矣
又奏死囚獄雖已具仍責家人伏辨以申
冤抑詔從之遷刑部侍郎入謝曰臣願因

是官廣陛下好生之德上大悅凡真卿所
平反多從之歷大興同尹德州防禦使同
知大名府事陝西西路轉運使河東北路
按察轉運使靜難軍節度使南京都轉運
使御史中丞以戶部尚書致仕年六十六
終于家諡曰文簡有注史記百卷公論二
十卷五聲姓譜五卷文集十卷傳於世

渭南縣齋秋雨

穴床撐拄小窗前一點青燈照不眠
簷溜淙琤風淅瀝嫩涼如水夜如年

假梅

綠窗嬌小似梅人素手東風巧思新
鸞尾剪裁千顆雪蜂脾點綴一家春
長教客枕生幽思不逐林花委路塵
莫道去非詩破的兔毫那解寫花真

臨泉道中

半世事行役茲游初未經峽門迷白晝
嶺脊上青

冥澗曲莓苔滑松盤霧雨溟登危人跼
躄涉險馬鈴竄落日番行客投鞭得驛
亭短墻明積雪破屋漏踈星羌笛誰三
弄羈懷強一聽葭蘆知不遠河外數峰
青

自感

形骸付與甄陶外禍福難防倚伏前
孔雀若知牛有角應須恐渴過寒泉

荒田擬白樂天

荒田幾歲闌人畊欲種糜蕎趣晚晴急手剪除荆
與棘一科才了十科生

樂府崔生

徽蘭二
崔名

徽門晝暖柳啼鴉蘭閣窗深月照紗腰素輕盈珠
袂穩鬢雲鬆亂玉釵斜春風一去空陳迹暮雨三
生只當家自倚廣平腸似石不妨綺語賦梅花

米元章大字卷

顏楊死去誰補處米狂筆力未可涯追摹古人得

高趣別出新意成一家老蛟駮雲肉倔強枯樹漬

雪冰植牙九原裴說如可作應有新詩三嘆嗟

裴說

懷素草書歌欲歸家三嘆嗟眼前
三箇字枯樹植鳥梢蛇黑老鴉

楊侯画晉公臨江賞梅樂天與鳥窠禪師汎

舟談玄不顧而去戲爲一絕以代晉公招樂

天同飲云

明粧冷盞雨清新面纈浮光數爵頻
拭風前寒莫液快來同醉雪中春

華陰雙璧傳山鬼
報道明年祖龍死
草間豪傑伺天時
攘袖撫衿爭欲起
藁祠篝火妖狐語
夥涉爲王張大楚
南公舊有三戶謠
東井新看五星聚
中原茫茫走秦鹿
天遣沛公興白屋
大蛇斬斷素靈號
蚩尤祭罷朱旗蠹
竭來扶義入關中
恩結人心帝道隆
秦法煩苛猶一洗
項王慄悍何勞攻
三傑相須立人紀
四老仍來安太子
已令陸賈說詩書

更詔孫通制儀禮
阿翁着手規摹遠
獨恨兒孫讀城旦
王純霸雜寧不知
不是不知知已晚

楚歌

沙丘車過亡明鏡
人頭畜鳴自賢聖
阿房殿裏醉宮娃
趙高手中持國柄
群雄雲擾蕩山東
邯鄲却隴秦圍中
項王一戰動天地
諸侯膝行過下風
割裂河山建侯國
天下畏威心不服
只貪衣繡榮楚猴
豈識金刀得秦鹿
楚歌一夜四面發
泣別虞姬

歌數闋殘兵牢落似晨星獨騎凌兢踏寒月烏江
渡口方喚船五侯追奔已江邊苦道天亡非戰罪
劍化壯氣成飛煙君王雄武古無比獨無仁義誰
相濟向能忠計資范增未必漢家能卜世穀城東
頭土一丘悠悠遺恨何年休

悲長平

秦兵伏甲武安西趙將非材戰士攜千里陣雲沉
曉日萬家屋瓦震秋輦哀纏朽骨天應泣怨入空

山鳥不棲百戰區區竟何得阿房烟草亦淒迷

雜陽

西來洛水遶崧高野店荒村換市朝董卓搜牢連
數月郭威斂市又三朝劫灰深掘終難盡鬼火爭
然忽自消千古興亡幾春夢只將閒話付漁樵

中秋對月

去年中秋客神京露坐舉杯邀月明今年還對去
年月北風黃草遼西城年年月色長清好只有悲

秋人易老兒童不解憶長安歌舞團圍遠翁媪人
 生宦游真可憐不知何處度明年預愁老罷廢詩
 酒負此冰玉秋嬋娟我生萬事隨緣耳居自無憂
 行亦喜君不見杜子閨中只獨看鄜州寐莫千山
 裏

寄答張維中

北轅千里赴陪都日覺還家計愈踈人事浮雲千
 變化宦途平地幾崎嶇青山有約長回首白髮無

情忽滿梳賴有同年老兄弟相思時寄數行書

保德州天橋

鬱鬱風雲入壯懷天潢飛下碧崔嵬兩崖偏側無
 十^{忱音}步萬頃逡巡納一盃濺沫紛紛跳亂雹怒濤
 殷殷轉晴雷曾聞雷火魚燒尾會趁桃花漲水來

靈石縣

古道行人少荒城亂石侵天橫機素直河入土囊
 深澗近雲長潤山高日易沈田翁樂豐歲歌笑下

崎嶇

真容院

魔宮佛界等空虛此理何曾屬有無直向臺山始
相見可中還有二文殊

讀火山瑩禪師詩卷

禪師隴州白氏岐山令君舉樞判文舉之弟自

幼日有詩名河東嘗有詩云十日柴門九
不開松庭雨後滿蒼苔草屨挂起跏趺坐
消得文殊更一來歸寂後
容有示其集者因題其上

長短都歸一夢中
身前身後兩無窮
李愷信士今

如在定向江湖訪澤公

君馬白

我馬瘦君馬肥我馬虺隤君馬飛
彫鞍寶枝錦障泥向風振迅長鳴嘶
一朝計落路傍兒銅鬲爲擲薪爲衣
瘦馬雖瘦骨骼竒古人相馬遺毛皮
千金一顧會有期

陳宮詞

三閣花深白晝迷酒催狎客賦
宮詞管絃散落春

風外一曲金釵兩鬢垂

崑崙

崑崙地勢橫三汜河朔城墉挂一箕紫塞高連寒日短黃榆落盡長年悲

按部道中二首

窟野河津水沒腰管岑官路雪封條一年樂事能多少強半光陰馬上消

又

寒城睥睨插山隅秋半霜風塞草枯月轉譙樓天未曉角聲吹徹小單于

日觀峰

半夜東風攪鄧林三山銀闕杳沈沈洪波萬里兼天湧一點金烏出海心

族兄才鄉下第後赴宜祿酒官以詩寄之

久期老距擅文場命壓人頭可得忙兩脚塵泥官業晚十年燈火夜窗涼霜添老葉山梨紫雨浥寒

花野菊香寒花一作寒蕞南北相望無百里幾時尊酒浣

離腸

梨花

丰姿閒淡洗粧慵眉綠輕顰秀韻重香惹夢魂雲

漠漠光搖溪館月溶溶陳家樂府歌瓊樹妃子春

愁慘玉容安得能詩韓吏部鄙西同去醉千鍾

後趙

擬偷人物指高光可笑梟雛不自量正使成名皆

豎子英雄也未到君行

古採蓮曲

洋洋長江水渺渺漲平湖田田青荇荷艷艷紅芙

蕖酣酣斜日外萋萋涼風餘舊舊誰家子裊裊二

八初兩兩並輕舟笑笑相招呼悠悠波上鴛潑潑

蒲中魚采采不盈手依依欲何如

擬迴文四首

春波綠處婦鴻過夜月明時飛鵲愁人去附書將

恨寄暮山雲斷倚高樓

又

樓上却來樓下待晚窗春盡斷回腸愁人有說嫌

人問淚洒新詩掃墨香

又

風幌半縈香篆細碧窗斜影月籠紗紅燈夜對愁

竟夢老盡春庭滿樹花

又

萋萋碧草連天遠杳杳行人幾日迴淒雨晚涼空

坐久淚粧殘暈溼紅腮

史內翰公奕

一首

公奕字季宏大名人系出石晉鄭玉和肇

父良臣宣和中擢第終於潞州觀察副使

季宏大定二十八年進士再中博學宏詞

科程文極典雅遂無繼之者累遷著作郎

翰林修撰同知集賢院正大中置益政院

楊吏部之美與季宏皆其選也以直學士
 致仕年七十三卒季宏文章書翰皆有前
 輩風調下至棊糊之技亦絕人遠甚閒閒
 稱其溫厚謙退與人交愈久而愈不厭其
 學問愈扣而愈無窮其見重如此詩文號
 涇水集兵後失之子應祖字企先孫彥忠
 今在燕中

李鴈門

天下三分二屬梁區區獨木欲支唐錦囊三矢傳
 遺恨不救朱三着赭黃

龐都運鑄 一十九首

鑄字才卿大興人家世貴顯明昌五年進
 士風流文采為時輩所推字畫亦有蘊藉
 仕至京兆運使自號默翁

雪谷曉裝圖

溪流咽咽山昏昏前山後山同一雲天公談笑玉

雪噴散為花蕊白紛紛詩翁瘦馬之何許忍凍吟
 詩太清古老奴寒縮私自語作奴莫比詩奴苦木
 僵石老鳥不飛山路益深詩益奇老奴忍笑憐翁
 癡不知嗜好乃爾為揚侯胸中富丘壑醉裏筆端
 驅雪落因何不把此詩翁画向草堂深處着

景骨城驛中夜雨

画角邊城算孤春野水秋一川霜樹老萬葉雨聲
 愁自古誰青眼勞生只白頭何時問漁父容我一

扁舟

洛陽懷古

草樹蕭條故苑荒山川慘淡客魂傷玉光照夜新
 開塚劍氣沈沙古戰場金谷更誰誇富麗銅駝無
 處問興亡一尊且對春風飲萬事從來穀與臧
 田器之燕子圖器之自叙云明昌丙辰予
 從軍塞外合虜里山野舍荒涼難以狀言春
 末有雙燕亦巢此屋土人不之識屢欲捕之

予曲爲全護此燕晝出夜歸予必開戶待之
 忽一日飛止坐隅都無驚畏巧語移時不去
 予始悟明日秋社此鳥當歸殆畱別語也因
 作一詩贈之云幾年塞外歷崎危誰謂鳥衣
 亦此飛朝向蘆陂知有爲算投茅舍重相依
 君憐我處頻迎語我憶君時不掩扉明日西
 風悲鼓角君應先去我何歸此詩以細字寫
 之爲蠟丸繫之燕足上明年四月予受代歸

又八年泰和甲子任潞州觀察判官四月十
 二日偶坐解舍之含翠堂忽雙燕至一飛簷
 戶間一上硯屏予諦視之繫足蠟丸故在乃
 知此鳥蓋往年贈詩者也因請同年龐君才
 卿画爲圖求諸公賦詩
器之姓田名琢雲翔人明昌五年進士仕至山東路宣撫使慷慨有志節聞
聞公所謂田侯落落奇男子者也
 田君才畧燕雲客少年累有安邊策悔從華硯取
 功名直要橫馳沙漠北塞垣春雪白皚皚東風未



放玄陰開烏衣之國定何許一雙燕子能飛來三
年驛舍安西道眼底鶯花無夢到忽見低飛入短
簷此身似向邯鄲覺君居海東我中原相逢乃在
穹廬前天涯流落俱爲客感時念遠空潸然長安
何限高高閣晝夜風閒開翠幕底事猜嫌不往依
甘從此地風沙惡土人嗜肉無仁心一生弋獵誇
從禽有巢幸穩勿浪出汝身未必輕千金朝來莫
去益狎昵物我相忘情意一但恠重裘積漸添元

是西風催社日須知音巧惟鷓鴣忽來坐隅如告
辭我方留寓未歸得爲君忍賦傷心詩詩成自述
聊爲戲繫足封之亦無意燕已歸飛我未歸刁斗
聲中忽驚歲旄頭夜落妖氛收嫖姚獻凱歸神州
玉關早喜班超入北海不聞蘇武留君才經世寧
終在幕府須賢來上黨別後歸期兩及瓜人間秋
燕十來往沈沈官舍紅芳稀葛衣燕居澹忘機忽
聞巧語入簷戶大似相識來相依一飛簷外窺庭

樹一上屏山驚不去解足分明得帛書真是當年
 番別句天生萬物禽最微固耶偶耶吾不知古道
 益遠交情醜朝恩算怨雲遷移當時握手悲別離
 一旦富貴棄如遺聞予燕歌應自疑慎無示之嗔

我譏

楊之美尚書詩云危巢客舍久相依常記西
 風社日歸海國傳心千驛隔塞垣回首十年

非新詩尚在人空老舊夢無憑鳥自飛寄語齊諧
 休志怪沙鷗相款解忘機張巨濟云沙塞相逢命
 已輕翠堂重見眼增明小詩繫足初無意巧語迎
 人獨有情陰德自招黃雀報機心能致白鷗盟社
 前秋後風光好須賀他年大厦成李之純云一別
 天涯十見春重來自髮一番新心知話盡春愁處

相對依依如故人王火用云相別相尋積歲年人
 心不及鳥心堅填償恩義三生債分付平安七字
 蕭王謝鳥兜疑誕誕紹蘭紅線定虛傳何如此段
 人親見舊話從今不直錢李欽并云塞上北風已
 十霜仁心覆護獨難忘當時相送詩仍在此日重
 來話更長客舍花開新信息雲兜香冷舊昏黃王
 人得報君知否千古珠璣在錦囊閒趙公三詩
 田思敬敬之川白晉卿趙承元王副樞子明許節
 張雲卿師褚各
 一詩此不具錄

晚秋登城樓二首

山勢碧環合溪光縞帶明牛羊成晚景砧杵助秋
 聲酒薄人情廢官閒吏事生天東歸興滿不為憶

尊羹

又
 落日危樓上詩成只自哦清商行老矣紅葉柰秋
 何隨甌前非悟跳丸去日多功名猶誑我未許著
 漁蓑

冬夜直宿省中

更散庭空宿鳥過凍吟聊復戰詩魔陶泓面冷真
 堪唾毛穎頭尖漫費呵畏事政宜賓客少不才偏

覺簿書多西窗燈闇尊無酒奈此迢迢夜漏何

山行絕句

四面雲山玉作圍一川霜樹錦為衣翩翩數騎南
 岡下傳粉王孫射鹿婦

澆酒圖

我愛陶淵明愛酒不愛官彈琴但寓意把酒聊開
 顏自得酒中趣豈問頭上冠誰作澆酒圖清風起
 毫端露電出形似神情想高閒大似揮絃時目送

飛鴻難袖中有東籬開卷見南山嗟予困塵土青
鬢時一斑折腰尚未免敢謂善閉關望望孤雲翔
羨羨飛鳥還歸田未有日掩卷空長歎

夏日

富國才疎合自羞清時無補但優游只知錢向紙
中裹不信能教地上流

花下

香滿西園曉雨微萬紅千翠自高低若為常作莊

周夢飛向幽芳開處棲

梨花

孤潔本無匹誰令先衆芳花能紅處白月共冷時
香縞袂清無染冰姿淡不妝夜來清露底萬顆玉
毫光

未開牡丹

國香半吐醉顏酡炫耀春工已自多愛惜不教催
羯鼓更澆郊酒看如何

却暑

九夏樓居不厭高更須直至冷雲巢
 風來蘋末聊自快暑滿人間無處逃
 蔗蜜漿寒冰皎皎画簾鈎冷月梢梢閒
 思殿閣生涼句誰為誠懸作解嘲

懷友

鏡裏衰顏失舊紅當年豪逸夢寬中
 山城對月中秋夜隴鴈寄書西北風
 遣興與誰同酒盞相思無處附詩筒
 憑高想到消寬處落日無言水自東

喜夏

小暑不足畏深居如退藏青奴初薦枕
 黃妳亦升堂鳥語竹陰密雨聲荷葉香
 晚涼無一事步屨到西廂

墨竹三首

隔溪烟雨

一溪流水玉涓涓溪上脩篁接暮烟
 誰倩能詩文與河筆端移得小江天

又

秋風驟雨

瀾川急雨暗秋空無限琅玕落墨中
劍甲擬擬軍十萬欲將貔虎戰斜風

又春雷起蟄

千梢萬葉玉玲瓏枯槁叢邊綠轉濃
待得春雷驚蟄起此中應有葛陂龍

山谷透絹帖

君不見李廣射虎如射兔霹靂一聲石飲羽
又不見戶靈擘山如擘雲蓮華萬仞雷掌痕精神入物

物乃爾筆端有神亦如此熙豐以來推善書
日下無雙黃太史胸中八法蟠虹霓
峩眉仙人容並馳平生敗筆塚纍纍
妙處不減磨崖碑呂侯好古蕪好異
與字分身作游戲清潭錯落印星壁
大澤縱橫散龍蛻又如漢宮粉黛爭
嬋娟倚風頽影影更妍豈無硬黃官
紙與臨做画師寫照非天然呂侯
之子今詩仙傳家以此為青氈須防
神物有時合却逐六丁飛上天

許司諫古 四首

古字道真永安中進士在宣宗朝以直言

極諫稱哀宗即位首命驛致之洛致仕授

右司諫未幾乞身還伊陽

開闢公制詞云安車蒲輪天子

所以厚優賢之禮黃冠野服人臣所以遂

歸老之心其息榮足以兩全而前後不可

多得有臣如此如卿幾人具官道直以方

氣剛而大議論非世儒所到名節以古人

自期擢自先朝置之諫列斥安昌竊位已

聞折檻之忠及梁冀伏辜方見埋輪之志

朕即天位稔聞直聲起之於田里退閒之

間超之於侍從論思之地完備始終之節

從容進退之間歎陽城之敢言惜其將去

念孔戣之既老挽之莫番特進一階榮躋

四秩華山拂袖最是為世上之閒神武挂

冠猶不負山中之相勉終晚節益介壽祺

郡守為起伊川亭道真性嗜酒老而未衰

每乘舟出村落間畱飲或十數日不歸及

泝流而上老稚奔走爭為之挽舟數十里

不絕其為時人愛慕如此正大七年年七

十四卒前三日有書見及字已歛傾矣

深谷緣危磴長林繞碧山山中四時好方外兩翁
閒身世青雲上塵埃大夢間高情應笑我才到却
空還

被召過少室

老病無堪合退休伊川久已得菟裘如今又上長
安道好被青山笑白頭

扇圖

雲壑溪塘小雪春融融和氣浥輕塵山禽共作梅

花夢物性由来懶是真

訪箕和尚峴山

箕出衣冠家在三屯山中有元夕懷京都
詩云一燈明處萬燈明天上人間不夜城
前日惠林洪覺範雪窗孤
坐聽猿聲甚為時人所稱

山中風定夜沈沈月滿襟松梢靜客心蒼檜四排嚴
法界孤松中立殿潮音鼓鍾有節人如玉臺殿無
塵地布金二月來游春尚淺紅梅無數照山陰

王防禦良臣 一十首

良臣字大用潞人永安五年進士作詩以
 敏捷稱又於內典有所得入翰林與李欽
 叔善從軍南征欽亦與行道中酬唱甚多
 有詩云蕎花并并蜜脾香禾穗纍纍鶻眼
 黃一縷晚烟吹不去為誰著意護秋霜欽
 叔愛之興定初自請北行沒於軍中贈孟
 州防禦使

送任李二生赴舉

塵澁鰲鉤公子恨風吹馬耳謫仙愁皇天老眼成
 人晚今日男兒得志秋官樣文章堆筆底世情風
 色候江頭主司不是冬烘物五色迷人莫浪憂

汴堤懷古

迷仙樓觀鬱連空一日都歸鬼唾中奢則兆亡天
 聽邇去而不返水聲東鎖烟弱柳愁蛾綠閣雨幽
 花淚臉紅搃為錦帆歸不得至今啼鳥怨東風

旬休飲



孌孌東風雪外還又催春色動谿山百年莫作千
年調十日須謀一日閒千丈歸心詩卷裏一襟豪
氣酒杯間醉鞭約住黃昏月馬首低懸玉半環

息軒

乾沒皇皇西復東不知假息禍機中黃金一日隨
肤篋腐骨千年付擣蓬世味甜於刀上蜜人心苦
似夢中蟲一庵松雪雙明底笑殺西山槁項翁

九月七日飲

紫霞零落帶孤禽平楚蒼蒼秋意深月過初三半
梳玉菊迎重九滿籬金天怜病骨商量暖雲促歸
程計會陰風鴈飛來更瀟洒一枝蘆雪印波心

牧牛圖

三摩不受一塵侵本分功夫日念深杖履得迴遊
子脚葛藤灰盡老婆心真狂不作風頭絮出入誰
傷井底金迴首人牛在何許一江明月夜沈沈

狸奴画軸

三生白老與烏負又現吳生小筆前乞與黃家禳
鼠禍莫教虛費買魚錢

雜詩三首

道人知我愛禪房淨掃階前紫石床軟飽三杯風
味好脫巾和月卧昏黃

又

老子平生酷愛閒天教行處得禪關粥魚敲落簾
頭月猶在梅花醉夢間

又

殘陽收拾弟兄行揀得機心不到鄉安置小奴今
夜夢蘆花風細月如霜

高治中廷玉

四首

庭玉字獻臣恩州人大定末進士章宗衛
王朝甚有時名為人豪爽尚氣節一時名
士多婦之貞祐初自左右司郎官出為河
南府治中與知府復興屢以公事相可否

時都城受圍使驛阻絕復興爲安撫副使
懼獻臣謀已乃以造逆訊之獻臣就逮龐
才卿雷希顏王士衡辛敬之皆被羅織幾
有一縲之禍比赦至獻臣瘦死矣獻臣多
作詩賦海中牛頭云鑿開混沌竅闖出神
農首人多稱道之猶子廣之今在河平

天津橋同李之純待月一首

驂鸞追散仙乘槎抵銀潢跳上玉龍背抱得銀蟾

光素娥愁不歸再拜捧瑤觴問以天上事玉色儼
以莊爾能爲我歌白雪我亦爲爾搗玄霜不然借
我廣寒殿與我長作無何鄉倘有謫仙人拍手笑
我狂天風忽吹散人月兩茫茫

柳絮

斷送春歸去紛飛不暫停和風三徑雪微雨一
萍蝶惹依芳草蜂沾過小庭靜宜投隙地狂欲
青冥得得穿朱戶時時撲翠屏黃鶯枝上語似與

訴飄零

道出平州寒食憶家

柳色方濃別玉京程程又值石龜城山重水複人
千里月苦風酸鴈一聲上國春風桃葉渡東陽寒
食杏花錫楚竟蜀魄偏相妒兩地悠悠寄此情

飛山怨

漢家自有飛將軍軍中駭歎箭有神一朝乃與獄
吏對惜無千金書牘背手把屬鏤口銜須號天者

三我何辜伊吾壯志長已矣不得提攜玉龍死可
伶休唱白浮鳩至今秦人悲杜郵

李治中適

六首

適字平甫樂城人明昌二年進士高才博
學無所不通為人滑稽多智而不欲表表
自見工画山水得前輩不傳之妙龍虎亦
入妙品然皆其餘事也泰和中大興幕官
時虎賊知府事賣權恃勢奴視同列平甫

每以公事相可否不少假借又摘其陰事
數十條欲發之虎謀篡者也聲勢焰焰人
莫敢仰視乃爲一書生所抗積不平先以
非罪誣染之幾至不測雖有以自解竟坐
是仕宦不進以東平治中致仕閒居陽翟
十餘年自號寄庵先生平生詩文甚多如
云舊管新收粧鏡在昨非今是酒杯乾贈
筆工云工不能書何以筆士須知筆乃能

書感事云半錢利路人乃虎一鉤名餌吾
其魚魯山道中云老夫自喜林野僻路人
頗笑衣裳寬散失之餘不復全見矣臨終
戒家人吾明日歸而輩慎勿遽笑果如期
而逝家人笑不禁良久開目云戒汝勿笑
令我心識散亂言畢目復暝其明了又如
此子治字仁卿正大七年收世科屏山贈
詩所謂仁卿不是人間物太白精神義山

骨者也

贈中山楊

果正卿

士道彫喪愁天公陰霾慘慘塵濛濛
 三冬不雪春未雨野桃無恙城西紅
 春光為誰作駘蕩造物若我哀龍鍾
 數行墨浪合眼死一匱閒氣終身窮
 中山公子文章雄雅隨童稚為彫蟲
 彌衡不遇孔文舉坡老懶事陳元龍
 唯之與阿將無同乾坤萬里雙飛蓬
 飄飄南北東西風

江村

陸地無根客江村有髮僧
 兩盂殘喘粥一寸苦吟燈

集句題廣寧滕覽亭

簷前無數好峰巒醉眼詩腸冰雪寒
 不識問山真面目請君來此凭闌干

獅子峰

解脫眼光三界靜端公伎倆一時休
 雲開正使金

毛現子細看来是石頭

送窮

昔年曾作送窮詩結柳齋糧擬退之送去還來還
復語君家猶有讀書兒

使高麗

去國五千里馬頭猶向東宦情蕉葉鹿世味蓼心
蟲倦枕三更夢征衫八月風山川秋滿眼歸思寄
孤鴻

陳司諫規

二首

規字正秣稷山人明昌五年進士博學能
文詩亦齊律度為人敦厚動有禮節南渡
以後諫官稱許古陳規而正秣不以訐直
自名尤見重云仕至右司諫卒官子良臣
今在燕中

送雷御史晞顏罷官南歸

五事前陳志拂劄屹如砥柱閱顏波一麾共惜延



年去三黜何傷柳季和連蹇仕途如我老激昂衰
俗在君多扁舟南去知難戀萬頃煙波一釣蓑

過驪山

豐鎬無由問故基三章止見黍離詩而今多少華
清石都與行人刺艷辭

馮內翰延登

一十七首

延登字子駿吉州人永安二年進士令寧

邊日適閒閒公守此州與之考論文義相

得甚歡故子駿詩文皆有律度正大未奉
命北使見番使招鳳翔不從欲殺者久之
割其鬚髯羈管豐州二年乃得還天興初
元授禮部侍郎京城陷自投井中子駿資
稟淳雅與人交殊款曲讀書長于易左氏
傳好賢樂善有前輩風調嘗欲作國朝百
家詩而不及也有集號橫溪翁子過大名
見於其子源如賦德順道院隴泉云玉壘

制方維瓊漿闕仙宅何人劓雲根一旦世
 地脉金匱鎖龍蔡月窟逗蟾液銅壺漏水
 清玉斗天醴碧光搖日千道影落天一席
 窈然伏池穴自與天壤隔又登封途中遇
 雨留僧舍云溼雲若烟低飛雨如矢集近
 山衣已涼薄寒復相襲霽景函草木秋意
 滿原隰林紅寒更殷山翠晴更溼不知高
 幾許但見蒼壁立群峰誰暇數庭筍紛戢

力戢騰擲來眼中左右疲頽揖皆其得意句
 也

鄆城道中

北風慘澹揚沙塵鄆西三日無行人十村九村雞
 犬靜高田下田狐兔馴昨朝屏息過溪口知有白
 額藏深榛赤子弄兵更可惻路旁僵尸衣血新野
 叟偃行拾薪欲語辟易如驚麕瘦梅踈竹未慰
 眼只有清淚沾衣巾

元日隆安道中

山岡重複三竿日溪路縈迴一席天老境飄零情
更惡又從馬上得新年

宿三冢寺

老柏蒼蒼纏老藤招提牢落有殘僧
暝禽自入藏經閣飢鼠時窺照佛燈
未得安心如北秀却思覓法
趨南能濛濛雨暗門前路更得雲房一曲肱

代郡楊黻之與余同辰月日時亦然渠有詩

因爲次韻

陰陽疊疊定何如自信祥金先有模
曾見唐生談躍馬豈知阮籍哭窮途
倦游笑我衰髯白弄筆怜君醉袖烏
便欲移書與歐九畧分餘論爲噓枯

寄笏青柯平

飛雪驚沙捲屋茅清寒澗水透綈袍
松風度壑江聲遠蘿月當軒扇影高
敢對名山談世事不妨空腹貯離騷
且將手版牢藏起政恐山人識馬曹

射虎得山字

田翁太息論三害獵騎俄驚見一斑
 涎口風生雷吼怒角弓寒勁月痕彎
 柳營共許千人敵魚服仍餘一矢還
 我欲殘年賞神駿短衣匹馬夢南山

雪

犀破寒無那庭空雪已深
 山川非舊觀松柏見貞心
 凍雀爭遺粒棲鴉點暮林
 攜琴訪溪友清興憶山陰

華清故宮

寵貴羊羔退曲江華清霧閣對雲窗
 層巒未了霓裳舞遷客俄驚羯鼓腔
 簷際疎星疑曉鏡天邊晴樹認高幢
 遊人尚喜風流在白石涵波阜萸雙

西園得西字

芳筵層巒百鳥啼芝廔蘭畹自成蹊
 仙舟倒影涵魚藻画棟銷香落燕泥
 淋漓景晴薰紅樹暖蕙風輕帆碧
 欖低岡頭醉夢俄驚覺歌吹誰家在竹西

八月十四日宿官塔下院二首

野僧引客看脩竹拄杖入林驚暝禽一道細泉鳴
蘚磴恍如閒聽穎師琴

又

喬松脩竹翠交陰涼月玲瓏地布金老懶無詩酬
節物夜涼閒聽候蟲吟

探春得波字

好雨新晴景氣和東陂冰盡水增波茅茨影裏燕

雙語桃李梢頭春幾何霽靄未收芳陌潤斜陽偏
傍小樓多雕鞍画轂方爭道更得番連藉綠莎

春雨二首

山市人歸暮雨飛倚筇久立看簷霏乍來勢若懸
麻密暫止聲如鼓瑟希砌下蟻歸低赤幘簾間燕
入溼鳥衣今宵客夢知安穩浥新涼到枕幃

又

小雨濛濛潤土膏谷風習習不驚條晨烟半溼低

平野春水初生沒斷橋已見鶯黃勻柳麥更看檀
紫上榆枿從今樂事知相繼櫛比雲平看隴苗

藤花得春字

白白紅紅委暗塵蒼藤次第着花新龍蛇奮起三
冬蟄纓絡紛垂百尺身見說紫雲偏得意不知翠
幄巧藏春齋厨晚甌清香滿未信侯門有八珍

蘭子野晚節軒

華顛益信寸心丹直道寧論末路難不歎士元淹

驥足但憂仲叔累猪肝籬根佳菊分秋色簾外長
松耐歲寒几有琴書尊有酒却愁兒輩覺清歡

洮石硯

鸚鵡洲前抱石歸琢來猶自帶清輝芸窗盡日無
人到坐看玄雲吐翠微

劉鄧州祖謙 三首

祖謙字光甫安邑人永安五年進士歷州
縣有政迹拜監察御史以鯁直稱其不能

俯仰世好盖天性然也正大初為右司都
 事除武勝軍節度副使召為翰林脩撰家
 多藏書金石遺文畧備父東軒工画山水
 故光甫以鑒裁自名至於信筆作簡牘尤
 有可觀一時名士如雷御史淵李内翰獻
 能王右司渥皆遊其門得人一詩可傳必
 殷勤稱道唯恐不聞人以此稱之子敏仲
 今在平陽

雅集圖

翠雀翩翩野鶴孤玉京人物會仙圖後來且莫輕
 題品席上揮毫有大蘇

崆峒山圖為橫溪翁賦二首

好奇仍有客相攜絕頂披雲快一躋三十六峰青
 似染五年拄笏羨橫溪

又

獨占名山每羨渠京塵今日汗吟鬚西州十載經

行處惆悵雲烟是回圖

高博州憲 八首

憲字仲常遼東人祖衍字穆仲國初進士
 仕至吏部尚書伯父守義大定十六年進
 士父守信以蔭補官封守禮宣徽使仲常
 黃華之甥幼學於外家故詩筆字画俱有
 舅氏之風天資穎悟博學強記在太學中
 諸人莫敢與抗泰和三年乙科登第自言

於世味澹無所好惟生死文字間而已使

世有東坡雖相去萬里亦當往拜之屏山

故人外傳說仲常年未三十作詩已數千

首矣釋褐博州防禦判官遼陽破沒於兵

間

元夕無燈

九陌無燈夜悄然
 小紅時見點春烟
 多情惟有梅梢月
 拍酒樓頭照管絃

寄李天英

稻結蒼蒼陂已枯
西風剪剪弄楸梧
蒹葭水落魚梁迥
蟋蟀聲高山驛孤
社甕新成元亮酒
并刀細落季膺鱸
作詩遠寄霜前鴈
人在海東天一隅

題新山寺壁

列壑攢峯發興新
落花飛絮舞餘春
虛堂坐視三千界
冠者相從五六人
澗草軟宜承屐齒
齒溪泉清可濯纓
塵靜聽山鳥松風裏
始悟人間樂未真

然香六言四首

抹利花心曉露蓄
薇萼底温風洗念
六根塵外忘情
一炷煙中

又

滿地落花春曉一
簾微雨輕陰正要
金蕉引睡不妨
玉隴知音

又

紙帳收烟密下松
灰卷火常虛午窳
春閒小睡人

間自有華胥

又

沈水濃薰甲煎宮梅細點波津爽爽非烟非霧依
依如幻如真

長城

秦人一鍛連雞翼六國蕭條九州一祖龍跋扈侈
心開牛豕生民付礧礧詩書簡冊一炬空欲與三
五爭相雄阿房未了蜀山上石梁擬駕滄溟東生

人膏血俱枯竭更築長城限裘褐卧龍隱隱半天
下首出天山尾遼碣豈知亡秦非外兵宮中拍鹿
皆庸奴驪原宿草猶未變咸陽三月為丘墟黃沙
白草彌秋塞惟有坡陀故基在短衣匹馬獨歸時
千古興亡成一慨

王監使特起 七首

特起字正之代州崞縣人智識精深好學
善論議音樂技藝無所不能長於辭賦出



入經史摘其英華以為句讀如天造神出
 至得意不減郭黼在張代州門下與屏山
 為忘年友泰和三年進士甲科調真定府
 錄事叅軍有惠政民立碑頌其遺愛改令
 沁源又遷司竹監使朝議欲以館職召試
 會卒遊龍德宮聯句云棘猴未窮巧槐蟻
 或失王賦雙峰竟秀云龍頭轟雙角駝背
 堆寒峯華山云三峰盤地軸一水落天紳

造化無遺巧丹青摠失真閒閒公屢哦此
 詩以為妙

沁源山中

野夫不識武城宰問之無言色微改但說今年秋
 雨多黃芪滿谷無人采踏遍西城錦石盤算投佛
 屋解征鞍隔林依約見燈火山谷人家初夜寒

挽張代州詞

大節

砥柱堂堂闢潰川諫書一紙力回天兩朝眷倚傳

龜玉五郡歡謠被管絃
芟舍棠陰餘舊綠
夜臺松月耿孤圓
行人謾洒碑前淚
誰識顏公是地仙

謾作

有時幽鳥話心事
無限秋蟲諄口才
北關上書吾老矣
東籬把菊思悠哉
竹林畱得巨源在
蓮社招入淵明來
不然餘子敗人意
懷抱耿耿胡為開

偶作

人情爭勝似爭碁
死怕輸人一著遲
黑白不分倚

袖手年來吾亦愛
吾癩

絕句二首

山勢奔騰如逸馬
水流委曲似驚蛇
溪靈不欲露天巧
眼力未到雲先遮

又

鳥語畱春春已迴
落花隨意卧蒼苔
清明寒食因循過
萱草薔薇次第開

下第

人間萬事等樗蒲敢謂何人不得盧勝負到頭俱
偶爾狂夫安用繞牀呼

李經

五首

經字天英大定人作詩極刻苦如欲絕去
翰墨蹊逕間者李趙諸人頗稱道之嘗有
詩云鴈奴失寒更拍拍叫秋水天長夢已
盡秋思紛難理最爲得意其餘或有不可
曉者累舉不第卒

雜詩五首

長河老秋凍馬怯冰未牢河山吟鞭底日暮風更
號

又

晨井凍不鑿誰療壯士飢天廢玉山未不救我馬
禮

又

塵埃汨沒伺候工離騷不振矜魚蟲風雲誰復話

蒼蔡不圖履豨袞屠龍挾牋搦管坐書空咿嚶堂
 上酣歌鐘乃知造物戲兒童不妨遠目送歸鴻莫
 恠魏瓠無所容此去未許江船東五經不埽途轍
 窮門庭日月生皇風太阿剖室礪以石坐埽鸛鶴
 搖天雄

又

巖林鬱雲日夕生陰雨雪縞夜秋黃老林人烟墨
 突樵徑雲深

又

造物開巖地巖帳揜劍壁苔花張古錦霜苦老秋
 碧日夕雲竇陰風鼓泉湧石馬蹄忌磽确樵道生
 枳棘盤盤出井底迴首悵如失長老不耐事底事
 挂塵迹披雲出山椒白鳥表林隙

梁太常持勝一首

持勝字經甫絳州人本名洵義避宣宗諱
 改父襄字公贊大定初進士質直尚義有

古人之風仕至保太軍節度使有諫興陵
 田獵表傳於世其賀章宗即大位表云曾
 天子祖天子世嫡相承舜何人予何人自
 強不息又自河南府倅移華州防禦使謝
 上表云昔同雒尹已陪嵩岳之呼今領華
 防願效封人之祝世亦稱之經甫泰和六
 年進士制策優等宏辭亦中選為人儀觀
 雄偉以文武志膽見稱貞祐初由太學博

士為咸平治中宗室承裕辟為僚佐承裕
 死太平謀不軌以兵脅經甫使作文移經
 甫大罵不從即日遇害時年三十六贈韓
 州刺史初赴官有詩云山雲欲雨花先慘
 客路無人身亦悲人以為識云

海棠

野杏山桃委路塵芳華都屬錦城春只緣造物偏
 番意任使無香亦可人粉白謾誇粧樣巧胭脂難

深睡痕新沈香亭子勾欄畔消得君王比太真

愚軒居士趙元三十四首

元字宜之定襄人經童出身舉進士不中

以年及調鞏西簿未幾失明自少日博通

書傳作詩有規矩泰和以後有詩名河東

李屏山為賦愚軒有落筆突兀無黃初之

句愚軒宜之自號也用是名益重南渡以

後往來洛西山中閒閒公雷御史王子文

許至忠崔懷祖皆愛之所至必虛左以待

為人有林幹處事詳雅既病廢無所營為

萬慮一歸于詩故詩益工若其五言平淡

處他人未易造也宜之之父名淋字清臣

由門資叙與先隴城為莫逆交故好問友

游間得宜之之詩為多子顯有隱節今居

鄉里

鄰婦笑

鄰婦笑聲苦一家十口今存五我親問之亡者
 誰兒郎被殺夫遭虜鄰婦笑聲哀兒郎未埋夫
 未迴燒殘破屋不暇葺田疇失鋤多草萊鄰婦笑
 笑不停應當門戶無餘丁追胥夜至星火急并州
 運米雲中行

渡洛口

一脉寒流兩岬冰斷橋無力強支撐忘機羨殺沙
 鷗好不省人間有戰爭

書懷繼元弟裕之韻四首

著龜不須問我命只自知多生隋宿業世網纏綿
 之驛驕受羈銜大笑跛鼈遲跛鼈亦復笑縮首甘
 自卑何必參漆園物理本自齊檳榔可消穀志士
 常苦飢穆之萬人雄猶不免此譏我懦更多病區
 區欲何為鍾鼎不可倖藜藿分所宜安能如黃蜂
 為人填蜜脾清白儻少汗平聲後人何所貽初學悔
 大謬篆刺工文辭年來厭酸醎淡愛陶潛詩愛詩

固自佳其如未忘機回頭四十年言動俱成非誰
能逐世利日以常規規惟當種溪田與子常相期

又

窗扉有生意山間春到時長安冠蓋塵游哉不如
茲西疇將有事老農真吾師不見元魯山夢寐後
所思遺山乃其後僻虜政坐詩時復一相過照眼
珊瑚枝奇書多攜來爲子卧聽之

又

少從白衫游氣與山崢嶸一念隋文字腸腹期在
撐多機天所災室暗燈不熒拈書枕頭睡鼻息春
雷鳴泰山與鴻毛何者爲重輕蹄涔與渤澥誰能
較虧盈如能平其心一切當自平

又

嵩箕有奇姿出雲何悠然雲山足佳處番客今幾
年有子罷讀書求種山間田粟里愧淵明香山慙
樂天二老已古人相望雲泥懸得酒邀月來對影

空白憐攝衣欲起舞稚子不須牽

喜霽

片段溪雲破縱橫野水涼人間泥塞路蠅動日烘
窗胤壁苔痕滿侵堦樹影雙還思釀新黍甕面挹

秋江

詩送辛敬之東歸二首

風埃憔悴舊霜袍老去新詩價轉高橡栗漫山猶
可煮不須低首向兒曹

又

文章無力命有在一點浩然天地間風雪滿頭人
不識又攜詩藁出西山

脩城去

甲戌歲忻城陷官復完治
途中聞哀歎聲感而有作

脩城去勞復勞途中哀歎聲嗷嗷幾年備外敵築
城恐不高城高慮未固城外重三壕一鋏復一杵
瀝盡民脂膏脂膏盡猶不辭本期有難牢護之一
朝敵至任推擊外無強援中不支傾城十萬戶屠

滅無移時敵兵出境已踰月風吹未乾城下五百
 死之餘能幾人鞭背駢行補城缺脩城去相對泣
 一身赴役家無食城根運土到城頭補城殘缺終
 何益君不見得一李勣賢長城莫道世間無李勣
 田間秋日三首
 好雨知時便放晴天和醞釀作西成秋收但得官
 軍飽未怕輸租遠十程

又

禾穗纍纍豆角稠崧前村落太平秋熙熙多必豐
 年意都在農家社案頭

又

瞽翁偃僂負薪行稚子跳梁剥棗聲不似二姑忙
 更殺晚春堆髻脫釵荆

客况

廬山踏遍却歸崧世事悠悠付老慵樂近僧居非
 佞佛苦無田種強為農菊花雨似人情冷梨葉霜

如酒力濃一十五秋河表客合教節物笑龍鍾

學稼

不堪炊煮一箱書十口東西若可餬食祿已慙中
隱吏墾山聊作下農夫藁遺場圃無多積子入官
倉困遠輸近日愚軒睡眠少打門時復有追胥

立秋日

况味年來老比丘禪房三伏得遲晉連宵雨作垂
垂曉十口家貧盼盼秋熟未先須伺禾黍有無何

暇問衣裘半生在却親燈火一事不成空白頭

村居夏日

官府不著名散迹村落深白雲自朝暮青山無古
今愛此夏日永門巷多繁陰呼兒具繩床不履亦
不簪殷勤好風來爲我消煩襟一飽萬事了何用
腰黃金羈勒困名馬網羅多珍禽何如山鹿麕啣
啣戀長林

次韻答裕之

薄暮敲門喜客佳
水萍風絮共天涯
行藏一話傾心肺
古律三詩淬齒牙
朱研不妨閒度日
青山終得共飡霞
扶持老病須君輩
滿地豺狼萬里家

書懷

懶退無心廩與庖
願携諸子劔山硤
閒消白日醒吟醉
猛省浮生夢幻泡
窈窕雲山三兔窟
漂搖風樹一鳩巢
聯名便入村家社
莫認公卿是故交

寄裕之二首

泪没兵塵滿鬢霜
買鄰心樂古清涼
閒陪老秀春行脚
悶欠矐元夜對床
正欲脫身求兔窟
誰能隨世轉羊腸
南陽未比嵩陽好
滿眼交游即故鄉

又

老懶愚軒百不能
飽諳人意冷於冰
清狂舊日耽詩客
灰朽而今有髮僧
夢裏紙衾三文日
話延雪屋一龕燈
新開一迳通蘭若
斬盡清涼舊葛藤

丙子夏卧病汗後有作

枯腸得水若通靈
渙汗週身一雨零
行客筋骸困
方歇醉人心骨喚
初醒病蟬移夢入
新殼老鶴息
神梳舊翎乞得殘
骸對兒女不愁無
粟貯陶瓶

宿少林寺

雙輪走雞樓下嶺
分間道行行得精
舍翠崦作迴
抱諸峰知客來
故故顏色好
征衫滿塵土
慙愧方
丈老殷勤
一瓣香爲我
除熱惱
世緣如落花
籬柵
跡俱歸箇中
有佳處
行脚恨不早
一庵祖師傍
異

日親結草

晚出

坐臥卧還起
畏此夏日長
出門鬢蓬鬆
西日明半
墻鳩鳴舍東柳
雌和墻南桑
十日暑煩苦
一雨方
論量偶然釋
憂抱露坐移
繩床群兒莫
相催老子
便晚涼

次韻裕之見寄二首

魚入深淵鶴在陰
飛潛何幸遠
危砧乾坤萬里雲

無迹冰雪三冬柏有心故國鉤留清夜夢歲華分
付白頭吟葦川擬作桃源隱共與青山閱古今

又

古屋颼颼四壁塵不堪幽獨足吟呻瓶儲看客常
年慣家具爲農近日新世味飽嘗惟可睡詩情漫
若不醫貧相從分我西山半欲乞臞元伴老身

題裕之家山圖

繫舟盤盤連石嶺牧馬澄澄倒山影山光水氣相
混涵中有元家舊廬并鴈門一開豺虎場駕言投
迹嵩之陽青山偃蹇不可將十年竟隨兵塵黃東
巖風物知猶在說與寄庵神已會一揮淡墨能似
之清輝遠寄形骸外元家故山吾與鄰夢見不如
畫圖真舊曾行處聊經眼未得歸時亦可人

早發寶應龍門道中有感

山僧送客客行東迴首雲寮夢寐中人語咿啾村
店火帽簷欹側石門風伊川遠暝春冰綠少頂先

挽曉日紅為問年來幾還往只應烏鵲識衰翁
欽若遽有商於之行作長語為別兼簡仲澤

弟一笑

廬山鏜然深可居洛水蚪然清可漁嘉哉山水有
如此不能留客如蘧廬楚茅不入干王誅大帥分
閫臨商於謀叅帷幄渴英俊蒐羅遠到山間癯隴
西四欽出將種人愛若也温而愉竭來誰飛薦鶚
書枕前隋檄催馳驅行叅幕賓亦大可把酒當為

帥君賀王家仲澤如仲宣共看吐竒飛玉唾一軍
彌令雅歌中聲落荆蠻滕先破愚軒退居如甌隴
閒暇多君時見過明朝笑語隔關山一月須拚面
墻卧

丁亥三月二十五日雪

夬變乾將至陰凝陽不流雨飛猶帶雪風急似號
秋草木無春意關河慘客愁天心寧易測三歎索
冬裘

大暑

旱雲飛火燎長空白日渾如隋甌中不到廣寒冰
雪窟扇頭能有幾多風

讀樂天無可奈何歌

鳧脛苦太短絃足何其多物理斬不齊利劍空自
磨老跣富且壽元惡天不訶伯夷豈不仁餓死西
山阿天意寓冥邈人心徒揣摩不如且飲酒流年
付蹉跎酒酣登高原浩歌無奈何

哀古道

山深道壞水縱橫怪得春來少客行不信天教人
迹斷水乾更遣蒺藜生

薛鼎臣罷登封

弄人鼓笛不相疑便著當場傀儡衣終日抱飢唯
飲水也和醉客一時歸

鼎臣林大夫宰登封有惠政今以例罷故有上句

密國公疇

四十一首

密公字子瑜興陵之孫越王之長子百年

以來宗室中第一流人也少日學詩于朱
巨觀學書于任君謨遂有出藍之譽文筆
亦委曲能道所欲言朝臣自閒閒公楊禮
部雷御史而下皆推重之資雅重薄于世
味好賢樂善寒士有不能及者明昌以來
諸王法禁嚴諸公子皆不得與外間交通
故公得窮日力於書讀通鑑至三十餘過
是非成敗道之如目前越王薨後稍得出

游文士輩亦時至其門家所藏法書名画
幾與中祕等客至貧不能具酒肴設蔬飯
與之共食焚香煮茗盡出藏書商畧之談
大定明昌以來故事或終日不聽客去風
流蘊藉有承平時王孫故態使人樂之而
不厭也所居有樗軒又有如庵自號樗軒
老人其詩號如庵小藁圍城中以疾薨時
年六十一

秋郊雨中

羸駝破蓋雨淋漓一抔烟林覆野塘不著沙禽閒
點綴只橫秋浦更淒涼

宴息二首

宴息春光晚閒眠晝景虛冥心居大道達理契真
如樂對忘形友欣逢未見書世間幽隱者何必盡

樵漁

又

日日閒窗下簟瓢樂不殊花魁穠且艷湖玉秀而
臞憶友尋詩卷思山展画图丹青傳六逸能著老
夫無

梁臺

汴水悠悠蔡水來秋風古道野花開行人驚起田
間雉飛上梁王鼓吹臺

自適

晴晝搖涼光長空澹虛碧燕鴻亦何為老翅南又

北衰柳隨殘葉庭戶覺岑寂幽人誦佛書清香縈
 几席西方病維摩東臯醉王績俱到忘言地佳處
 畧相敵小齋蝸角許夜卧膝仍屈能以道眼觀寬
 大猶四極有書貯實腹無事梗虛臆謝絕聲利徒
 尚友古遺直

城西

鴈帶邊聲遠牛橫廢壠長人居似河朔岡勢接滎
 陽禾短新村野沙平古戰場悠然望西北暮色起

悲涼

送王生西游

飛伯

紫陘仙人今淵雲騎風御氣七尺身丈夫恥與噲
 等伍故作野鶴昂雞群往年書劍游梁日啖唾中
 間滿珠璧温子徒勞手八又蘇老猶迷目五色慨
 然拂袖遊嵩陽西南陌上書傳香仲宣堂堂舍我
 去舉杯却愁愁更長去程相近黃花節三十六峰
 如玉列龍門楓葉隨紅綃洛浦蘆花舞晴雪勳名

細事猶秋毫政可痛飲讀離騷天津月照紫綺裘
緱嶺風吹青玉簫我無羽翼隨君起浩歌相送秋
光裏憑高西望青茫茫落日無情下寒水

王生以秋騷見示復以此謝之

三年京國與君遊每恨知君尚未周始露雒文陵
楚些又登長陌佩吳鉤燈殘茅店雞催曉霜落金
風鴈喚秋後夜文星出西洛仲宣知在水南樓

自題寫真

枯木寒灰以亦神回緣來現昨公身只緣酷愛東

坡老人道前身趙德麟

樽軒嘗封肱國公故云

黃華画古柏

黃華老人画古柏鐵簡將軍挽大弔意足不求顏

色似荔支風味配江瑶

鐵簡萬戶以神射名天下

書龍德宮八景亭

刻桷朱楹隋紺紗裙腰草色趣堦斜誰知剝落亭
中石曾聽宣和玉樹花

思婦

四時唯覺漏聲長
幾度吟殘蠟燭缸
驚夢故人風動竹
催春羯鼓雨敲窗
新詩淡似鶯黃酒
婦思濃如鴨綠江
遙想翠雲亭下水
滿陂青草鷺鷥雙

如庵樂事

人間最美安心睡
睡起從容盥漱終
七卷蓮經藝沈水
一杯湯餅澆油蔥
因循默坐規禪老
取次拈詩教小童
炕煖窗明有書冊
不知何者是窮通

題晉卿王暉寶繪

顧陸張吳寶繪堂
風花雪月保寧坊
錦囊玉軸三千幅
翠袖金釵十二行
數筆丹青叅季范
一時遷謫爲蘇黃
太原珍玩名天下
舊跡猶憑古印章

得友人書

聞有書來喜欲狂
紫芝眉宇久難忘
別離惟歎我頭白
詩句屢成君馬黃
公幹羈栖猶洛下
孔明高卧尚南陽
冷官領取閒中趣
遠勝區區夢蟻忙

相尚內族子銳歸來堂

一旦能知夢裏真平生看破主中賓歸來堂上忘
形友名利場邊稅駕人東郭風烟宜蕙帳南山猿
鶴識綸巾清尊雅趣閒棊味盞盞冲和局局新

題潘閨夜歸圖

不是詩人灞水孺又非野老曲江邊風姿便認王
摩詰蘊藉還疑李謫仙驢背倒騎蓮岳下牛腰穩
跨竹林前掀髯對月餘高興明日佳篇幾處傳

漫賦

貧知囊底一錢無老覺人間萬事虛富貴儻來終
作廢勳名便了又何如季鷹未飽松江鱸魯望將
成笠澤書自是杜門無客過不關多病故人疎

寓跡

寓跡中山記昔年西溪卜築欲終焉飄零何在五
株柳離亂難歸二頃田漫叟未能忘野寺道人猶
解識林泉吾鄉已宅無何有一笑醯雞盡甕天

秋晚出郭閒遊
 塵中俗事海漫漫暫出城闈借眼寬沙麓去邊群
 牧小野雲平處一鵬盤殘荷露水秋光晚衰柳搖
 風古渡寒此幅大年橫景画魯岡圖上似曾看

老境

老境唯禪况幽居似寶坊酒盃盛硯水經卷貯詩
 囊懶甚書彌少閒多夢自長不知何處雨徑作夜
 來涼

北郊晚步

陂水荷凋晚茅簷燕去涼遠林明落景平麓淡秋
 光群牧歸村巷孤禽立野航自諳閒散樂園圃意
 尤長

閒詠

歲晚陶元亮平生馬少游凋殘半枯木浩蕩一虛
 舟鶴望塵迷眼雞棲屋打頭瓶儲尚蕭索焉敢計
 菟裘

池蓮

輕輕姿質淡娟娟
點綴圓池亦可憐
數點忽飛荷葉雨
算香分得小江天

梁園

一十八里汴堤柳
三十六橋梁苑花
縱使風光都似舊
北人見了也思家

釋迦出山息軒画

厖眉袖手出巖阿
及至拈花事已訖
千古雪山山

下路杖藜無處避藤蘿

過胥相墓

亭亭華表暎朱門
始見征西宰相尊
下馬讀碑人不識
夷山高處望中原

秋日小雨

白鷺徘徊花鴨遊
城南城北豈汀洲
綠荷風底飛來雨
做弄今年甲子秋

東郊瘦馬

此歲無秋畎畝空病駢難遣齧枯藪倉儲自益鴛
駘肉獨爾空嘶首藉風

枕上聽雨

卧聽羯鼓打涼州元是芭蕉細雨秋庭際玉簪開
幾許小窗特地算香幽

溪景

飛飛鷗鳥自徜徉也解新秋受用涼日算碧溪微
雨過滿風都是藕花香

題紙衣道者

紫袍披上金橫帶藜杖拖來紙掩襟富貴山林爭
幾許萬緣唯要總無心

春半喜晴

陰寒二月雪含雲兩日開晴泚景新借問海棠紅
幾許杏花楊柳不曾春

漁父詞二首

楊柳風前白板扉荷花雨裏綠蓑衣紅稻美錦鱗

肥漁笛閒拈月下吹

又

釣得魚來卧看書
船頭穩置酒葫蘆
烟際柳雨中
蒲乞與人間作畫圖

馬伏波

可歎迂疎一老翁
豈堪床下拜梁松
明珠惹惹猶
難辨萬里爭教論杜龍

雷侯

碎穀輕身慕赤松
不知誰舉傅春宮
君方避溺猶
居水忍使餘波及四翁

對鏡二首

鏡中色相類吾深
吾面終難鏡裏尋
明月印空空
受月是他空月本無心

又


明明非淺亦非深
何事癡人泥影尋
照見大千真
法體不關形相不關心

夏晚登樓

登樓晚暑復相攻快意清風忽此逢雲似碧山天
似水齋波平浸兩三峰

華亭

世尊遺法本忘言教外別傳意已圓隻履攜將葱
妨來上月明船



中州集卷五

終

